

《普賢行願品疏節錄》

目次

普賢行願品疏節錄.....	2
文殊師利發願經.....	21
普賢菩薩行願讚.....	23

普賢行願品疏節錄

大方廣佛華嚴經入不思議解脫境界普賢行願品第四十卷疏節錄

唐羅賓國三藏沙門般若譯經
唐清涼山大華嚴寺沙門澄觀疏義
浙西徐文尉敬錄

此即貞元新譯大方廣佛華嚴經第四十卷也。此華嚴經。自流東夏。大有三譯。第一東晉沙門支法。領至遮拘盤國。請得華嚴梵本三万六千偈。請北天竺三藏佛馱跋陀羅譯成晉經六十卷。第二大唐證聖元年武周于闐三藏實叉難陀。再譯舊文。兼補諸闕。計益九千頌。通舊總四万五千頌。合成唐本八十卷。第三貞元十二年德宗詔罽賓三藏般若成四十卷。即舊經入法界一品。今此一卷。即彼四十卷中第四十也。而為華嚴關鍵。修行樞機。文約義豐。功高益廣。能簡能易。唯遠唯深。可讚可傳。可行可寶。故西域相傳云。普賢行願讚。為略華嚴經。大方廣佛華嚴經。為廣普賢行願讚。讚謂經之偈讚以今觀之。理實然矣。一經之主。即是普賢。初會即是普賢所說。窮終亦是普賢所說。五周之因。皆普賢行。五周之果。即普賢行之所成。亦是得果不捨因門之果用爾。復是四十卷之窮終。遍收玄妙。

經題七字。即為七義。大。體也。方相也。廣。用也。佛。果也。華。因也。嚴。總相也。經。能詮也。人法雙題。法喻齊舉。體用無礙。因果周圓。故無盡法門。不離此攝。

品名十二字。分為三節。不思議解脫境界。即所入也。普賢行願。為能入也。入之一字。通能通所。心智契合。悟解得證。總名為入。心言罔及。為不思議。作用離障。稱為解脫。智造分域。名為境界。德周善順。稱曰普賢。造修希求。目為行願。行之與願。如車二輪。如鳥二翼。翔空至遠。網不由之。何者是普賢行。謂總該萬行。行布圓融。何名普賢行。略有二義。一以人取法。普賢菩薩之所行故。二直就法說。隨一一行。皆稱法界。遍調善故。此一品經。當本經第九會第四分。而一教終極。文富義博。更開二會。第一本會。唐譯卷六十至六十一上半。貞元譯卷四一至三。第二末會。唐譯卷六十一。貞元譯卷四爾時文殊師利從善住樓閣出以下訖經終皆是。末會五十五人。攝為五相。初有四十一人。名寄位修行相。唐譯卷六十一至七十五。貞元譯卷四至三十。第二摩耶夫人下。有十一人。名會緣入實相。唐譯卷七十六至七十七上半。貞元譯卷三十一至三十四上半。第三彌勒菩薩。名攝德成因相。唐譯卷七十七下半。至七十九貞元譯卷三十四下半至三十八上半。第四後文殊菩薩。名智照無二相。唐譯卷八十首頁。貞元譯卷三十八。第五普賢菩薩。名顯因廣大相。

第五顯因廣大相。文中分五。第一依教趣求。第二聞睹前相。第三見親證。第四聞佛勝德。已上即唐譯末卷。貞元譯卷三十八下半訖三十九。

第五重示普因。即此一卷此一卷經。前經兩譯皆所未有。古德判云經來未盡。故無流通。斯言驗矣。晉代譯主。先朝六辨正三藏。皆譯出偈。而闕長行。良以西天頻遭毀滅。致令大部或斷或連。今梵本昭彰。文勢連續。文中三。第一結前所說。第二正示普因。第三結說欣慶。

爾時普賢菩薩摩訶薩。稱嘆如來勝功德已。告諸菩薩及善財言。善男子。如來功德。假使十方一切諸佛。經不可說不可說佛剎極微塵數劫。相續演說。不可窮盡。

今初。稱嘆如來勝功德已。指前廣偈。告諸已下。結說不盡。即是前文末後偈意。前云無人能盡說佛功德者。猶為通因。今明果人勝而且多。歷時長久。相續無間。說尚不盡。況於凡小。以是究竟無盡法故。

若欲成就此功德門。應修十種廣大行願。

第二正示普因。即廣說能證普賢行願。令入法界。則成如來勝功德故。若不依此普賢行修。設經多劫。亦不成故。文分二別。先長行。後偈頌。前中文有三分。第一正顯普因分。第二顯經勝德分。第三結勸受持分。初分有四。第一標示所應。第二徵列名數。第三牒名別解。第四結益令知。今初。此功德門。指上佛功德。應修已下。正示普因。希欲為願。造修為行。寄圓說十。

何等為十。一者禮敬諸佛。二者稱讚如來。三者廣修供養。四者懺悔業障。五者隨喜功德。六者請轉法輪。七者請佛住世。八者常隨佛學。九者恒順眾生。十者普皆回向。

第二徵列名數。然此即是常行禮懺。諸經論中開合不同。若離垢慧菩薩所問禮佛法經。總有八重。一供養。二讚德。三禮佛。四懺悔。五勸請。六隨喜。七回向。八發願。或但為七。合禮讚故。或但有六。略供養故。或但為五。以發願回向。得總別異故。如十住毗婆沙第五回向。亦同有五。或但有四。除禮拜故。或但為三。故智論云。菩薩晝夜三時。各行三事。謂懺悔。勸請。隨喜。行此三事。功德無盡。轉得近佛。若善戒經但有二事。謂懺悔。迴向。皆隨時廣略。今文具十。以表無盡。六七二事。俱是勸請。八九二事。迴向開出。餘至文顯。

善財白言。大聖。云何禮敬。乃至回向。

第三牒名解釋。於中二。先總徵。

普賢菩薩告善財言。善男子。言禮敬諸佛者。所有盡法界虛空界十方三世一切佛剎極微塵數諸佛世尊。我以普賢行願力故。深心信解。如對目前。悉以清淨身語意業。常修禮敬。一一佛所。皆現不可說不可說佛剎

極微塵數身。一一身。遍禮不可說不可說佛刹極微塵數佛。虛空界盡。我禮乃盡。以虛空界不可盡故。我此禮敬無有窮盡。如是乃至眾生界盡。眾生業盡。眾生煩惱盡。我禮乃盡。而眾生界乃至煩惱無有盡故。我此禮敬。無有窮盡。念念相續。無有間斷。身語意業。無有疲厭。

後別釋即為十段。段各有三。一牒名。二釋相。三總結無盡。且初第一禮敬諸佛。文三段者。第一牒名。由心恭敬。運於身口而遍禮故。除我慢障。起敬信善。勒那三藏說七種禮。今加為十。謂一我慢禮。如碓上下。無恭敬心。二唱和禮。高聲喧雜。辭句渾亂。此二非儀。三恭敬禮。五輪著地。捧足殷重。四無相禮。深入法性。離能所相。五起用禮。雖無能所。普運身心。如影普遍。禮不可禮。六內觀禮。但觀身內法身真佛。不向外求。七實相禮。若內若外。同一實相。八大悲禮。隨一一禮。普代眾生。九總攝禮。攝前六門以為一觀。十無盡禮。入帝网境。若佛若禮。重重無盡。文中正辨第五九十。實通後八。對文可知。二所有無盡法界下。釋相。於中三。初所禮境。謂橫豎普周。盡帝网境。二我以普賢下。明能禮因。略有二因。一以普賢願力。此即法力。不依行願。不能遍故。二深信解力。此即自力。謂印持諸佛遍於時處。如對目前。三悉以下。辨能禮相。於中二。先總明。謂三業皆遍。常無間故。後一一佛所下。別顯。謂一佛之前。頓見多身。一身之禮。等刹塵數。是周遍相。三虛空界盡下。總結無盡。於中二。先顯無盡。後形無間。前中准十地經。有十無盡界。今此有二。謂虛空。眾生。於眾生中。開出業惑。故成其四。眾生無邊。一一眾生有多業惑。彌顯無盡。文中二。先別明虛空。後總例餘三。今初。先反顯。後以虛空界不可盡故下。順釋。後如是乃至眾生界下。總例餘三。二念相續下。彰無間斷。疲謂疲倦。厭謂厭足。下之九門無盡例此。

復次善男子。言稱讚如來者。所有盡法界虛空界十方三世一切刹土。所有極微一一塵中。皆有一切世間極微塵數佛。一一佛所。皆有菩薩海會圍繞。我當悉以甚深勝解現前知見。各以出過辯才天女微妙舌根。一一舌根。出無盡音聲海。一一音聲。出一切言辭海。稱揚讚嘆。一切如來諸功德海。窮未來際。相續不斷。盡於法界。無不周遍。如是虛空界盡。眾生界盡。眾生業盡。眾生煩惱盡。我讚乃盡。而虛空界乃至煩惱無有盡故。我此讚嘆。無有窮盡。念念相續。無有間斷。身語意業。無有疲厭。

第二復次。稱讚如來。初標可知。二所有下。釋相。於中三。初所讚境。次我當悉以下。辨能讚因。後各以出過下。辨能讚相。三如是虛空界盡下。結其無盡。文少略前。若具說者。皆如初段。

第三復次廣修供養。初標名。二所有盡法界下。釋相。於中二。先正明供行。後校量顯勝。前中四。一所具供境。二我以普賢下。能供因。三悉以下。列所供具。四以如是等下。正明供養。二善男子諸供養中下。校量顯勝。文中二。先正校量。後徵釋所以。今初先舉所校量。後正校量。前中先總。後所謂下別。別明七行。皆法供養。後善男子下。正明校量。准今經文。以前本行供養。校量法供養。然下偈之中。更無校量。但舉本行為勝供養。明知校量欲顯本行供養為勝。故梵本云。復次善男子。彼彼一切最勝供養。及法供養。修行供養。乃至不離菩提心供養。一念中以彼彼供養如來已。得最勝善根增長積集。過去供養善根百分不及一等。此中意云。上來觀行。名最勝供養及法供養。此上二類。一念善根。是所校量。過去供養。為能校量。以未修普賢行願供養。不及今修普賢觀行供故。又法供養通十法行。修行最勝。修行通於萬行。依觀供養。正是修行。故法華中喜見燒身。名法供養。淨名教於善德行施。無前無後。一時等施。名法供養。是則財施若能稱法。皆法供養。況於深觀非法供養。智者應思。案圭峰鈔云。此七種法行。但是所標之心。經言如說修行者。即如前所說觀行。如是而行。名如說修行也。言利益眾生等者。即修觀行之時。一一與此利益等心相應。是則名為真法供養也。言迦羅者。此云豎折人身一毛以為百分。言優波尼沙陀者。此云近少。亦云近對。謂少分相近比對之分。後何以故下。徵釋。徵意云。何以過去財供不及今供。釋意云。佛尊重法。行法供養故。校量不及。三此廣大最勝供養下。總結無盡。此最勝供養。即前觀行。若此最勝不及法者。何以無盡。

復次善男子。言懺除業障者。菩薩自念我於過去無始劫中。由貪嗔癡。發身口意。作諸惡業無量無邊。若此惡業有體相者。盡虛空界不能容受。我今悉以清淨三業。遍於法界極微塵刹一切諸佛菩薩眾前。誠心懺悔。後不復造。恒住淨戒一切功德。如是虛空界盡。眾生界盡。眾生業盡。眾生煩惱盡。我懺乃盡。而虛空界乃至眾生煩惱不可盡故。我此懺悔無有窮盡。念念相續。無有間斷。身語意業。無有疲厭。

第四復次懺除業障。初標名者。懺者梵音。具云懺摩。此云悔過。若別說者。懺名陳露先罪。悔名改往修來。除惡業障。成淨戒善。是故文中偏名懺業。實則三障四障。無不皆懺。二菩薩自念下。釋相。然懺有二種。若犯遮眾。先當依教作法懺之。若犯性罪。復須起行。起行二種。一事二理。事如方等佛名經等。通於萬行。理如淨名觀罪性空。不在內外等。普賢觀經及隨好品。具二種懺。觀經中明晝夜精勤禮十方佛。即是事懺。觀心無心。從顛倒想起。若欲懺悔者。端坐念實相。斯則理懺。隨好品中。等眾生界善身語意。悔除諸障。即是事懺。觀諸業性非十方

來。止住於心。從顛倒生。無有住處等。即是理懺。事懺除末。理懺拔根。若具足懺。應須善達逆順十心。謂先識十種順生死心以為所治。一妄計人我。起於身見。二內具煩惱。外遇惡緣。我心增盛。三內外既具。滅善心事。不喜他喜。四縱恣三業。無惡不為。五事雖不廣。惡心遍布。六惡心相續。晝夜不斷。七覆諱過失。不欲人知。八虜扈抵突。不畏惡道。九無慚無愧。不懼凡聖。十撥無因果。作一闡提。從無始來。若自及他。無不皆爾。次起十種逆生死心。從後翻破。一明信因果。二自愧克責。三怖畏惡道。四不覆瑕玼。五斷相續心。六發菩提心。七修功補過。八守護正法。九念十方佛。十觀罪性空。若具此者。無罪不滅。隨好品中具有能治。今文之中。含有不具。文分為二。先舉所懺。後辨懺相。今初。由貪瞋癡者。是惡業因發身口意。是造業具。三業十支。皆由三毒。作諸惡業者。即是業體。有二三種。一。善。惡。不動。今唯取惡。二。現。生。後。今通此三。三三合九種。從三煩惱起。即其義也。無量已下。辨其廣多。以無形故。不見相貌。有則溢空。此則通說順流十心。後我今悉以下。正辨懺相。清淨三業者。明懺業具。昔因三業。無惡不為。今此三業。一時齊懺。謂虔恭胡跪。口陳辭句。遍於法界。下明所對境。遍法界者。略有二意。一昔所造罪。心事遍布。故今懺悔。亦須周遍。二稱法性故。何罪不除。諸佛菩薩下。正辨所對。即念十方佛。翻昔惡友。誠心懺悔者。簡不至心。緩縱情慮。罪不滅故。懺悔即含自愧克責。怖畏惡道。不覆瑕玼後不復造者。即斷相續心。安住淨戒一切功德者。即修功補過。匪移山岳。豈填溝壑。總此懺者。以明識因果善惡影響故。亦即守護正法。三如是下。總結無盡。

復次善男子。言隨喜功德者。所有盡法界虛空界十方三世一切佛刹極微塵數諸佛如來。從初發心。為一切智。勤修福聚。不惜身命。經不可說不可說佛刹極微塵數劫。一一劫中。捨不可說不可說佛刹極微塵數頭目手足。如是一切難行苦行。圓滿種種波羅蜜門。證入種種菩薩智地。成就諸佛無上菩提。及般涅槃。分布捨利。所有善根。我皆隨喜。及彼十方一切世界六趣四生一切種類。所有功德。乃至一塵。我皆隨喜。十方三世一切聲聞及辟支佛。有學無學。所有功德。我皆隨喜。一切菩薩所修無量難行苦行。志求無上正等菩提。廣大功德。我皆隨喜。如是虛空界盡。眾生界盡。眾生業盡。眾生煩惱盡。我此隨喜。無有窮盡。念念相續。無有間斷。身語意業。無有疲厭。

第五復次明隨喜行。初標名者。由昔不喜他善。故今隨喜。為慶悅彼。除嫉妒障。起平等善。然餘處隨喜在勸請後。謂先滌身器。次欣法雨。後攝他同己。回向

三處。故為此次。今明隨喜是懺中別義。事勢相連。故先明之。平等廣大。方堪聞法。二所有盡法界下。釋相。謂隨喜四類。以攝諸善。一喜如來善。二及彼十方下。喜六趣四生善。三十方三世下。喜二乘善。四一切菩薩下。喜菩薩善。佛為最勝。所以先明。餘之三類。從劣向勝。大品經中隨喜品明大千海水。一毛破為百分。滴取海水。可知其數。隨喜之福。不可知數。故結無盡。等虛空界。法華隨喜。展轉至於第五十人。尚難校量。何況最初。此隨喜如來權實功德。故佛為最勝。三如是下。總結無盡。

復次善男子。言請轉法輪者。所有盡法界虛空界十方三世一切佛剎極微塵中。一一各有不可說不可說佛剎極微塵數廣大佛剎。一一剎中。念念有不可說不可說佛剎極微塵數一切諸佛成等正覺。一切菩薩海會圍繞。而我悉以身口意業種種方便。殷勤勸請轉妙法輪。如是虛空界盡。眾生界盡。眾生業盡。眾生煩惱盡。我常勸請一切諸佛轉正法輪。無有窮盡。念念相續。無有間斷。身語意業。無有疲厭。

第六復次明請轉法輪行。初標名者。即是勸請。除謗法障。起慈善根。聲聞自度。但懺而已。菩薩憫眾。故須勸請。請佛普雨。自必霑洽。二所有下。釋相中二。先舉所請境。後而我下。正明請法。三如是上。總結無盡。

復次善男子。言請佛住世者。所有盡法界虛空界十方三世一切佛剎極微塵數諸佛如來。將欲示現般涅槃者。及諸菩薩聲聞緣覺有學無學。乃至一切諸善知識。我悉勸請莫入涅槃。經於一切佛剎極微塵數劫。為欲利樂一切眾生。如是虛空界盡。眾生界盡。眾生業盡。眾生煩惱盡。我此勸請無有窮盡。念念相續。無有間斷。身語意業。無有疲厭。

第七復次請佛住世行。初標名者。即是勸請別義。二所有下。釋相中標從勝說。但請如來。釋從通意。三乘皆請。三如是下。總結無盡。

復次善男子。言常隨佛學者。如此娑婆世界毗盧遮那如來。從初發心。精進不退。以不可說不可說身命而為布施。剝皮為紙。析骨為筆。刺血為墨書寫經典。積如須彌。為重法故。不惜身命。何況王位城邑聚落宮殿園林一切所有及餘種種難行苦行。乃至樹下成大菩提。示種種神通。起種種變化。現種種佛身。處種種眾會。或處諸大菩薩眾會道場。或處一切聲聞及辟支佛眾會道場。或處轉輪聖王小王眷屬眾會道場。或處剎利及婆羅門長者居士眾會道場。乃至或處天龍八部人非人等眾會道場。處於如是種種眾會。以圓滿音。如大雷震。隨其樂欲。成熟眾生。乃至示現入於涅槃。如是一切。我皆隨學。如今世尊毗盧遮那。如是盡法界虛空界十方三世一切佛剎。所有塵中一切如來。皆亦如是。於念念中。

我皆隨學。如是虛空界盡。眾生界盡。眾生業盡。眾生煩惱盡。我此隨學無有窮盡。念念相續。無有間斷。身語意業。無有疲厭。

第八復次常隨佛學。此下三段皆是回向。前二節回向中別義。故下偈中第七行竟。便標回向。欲收此二屬回向故。若別說者。即是所修二利行體。亦是別說所回善根。今此標名。義同等一切佛回向亦自利行。二如此娑婆下。釋相於中。二。一學本師。二例一切。前中亦二。先明所學。後辨能學。前中又二。先明因行。後乃至下。辨果行用。後如是一切下。辨能學。二如今世尊下。例一切佛。三如是下。總結無盡。

復次善男子。言恒順眾生者。謂盡法界虛空界十方剎海。所有眾生。種種差別。所謂卵生胎生濕生化生。或有依於地水火風而生住者。或有依空及諸卉木則生住者。種種生類。種種色身。種種形狀。種種相貌。種種壽量。種種族類。種種名號。種種心性。種種知見。種種欲樂。種種意行。種種威儀。種種衣服。種種飲食。處於種種村營聚落城邑宮殿。用至一切天龍八部人非人等無足二足。四足多足。有色無色。有想無想。非有想非無想。如是等類。我皆於彼隨順而轉。種種承事。種種供養。如敬父母。如奉師長及阿羅漢。乃至如來。等無有異。於諸病苦。為作良醫。於失道者。示其正路。於暗夜中。為作光明。於貧窮者。令得伏藏。菩薩如是平等饒益一切眾生。何以故。菩薩若能隨順眾生。則為隨順供養諸佛。若於眾生尊重承事。則為尊重承事如來。若令眾生歡喜者。則令一切如來歡喜。何以故。諸佛如來。以大悲心而為體故。因於眾生。而起大悲。因於大悲生菩提心。因菩提心。成等正覺。譬如曠野沙磧之中。有大樹王若根得水。枝葉華果。悉皆繁茂。生死曠野菩提樹王。亦復如是。一切眾生而為樹根。諸佛菩薩而為華果。以大悲水饒益眾生。則能成就諸佛菩薩智慧華果。何以故。若諸菩薩以大悲水饒益眾生。則能成就阿耨多羅三藐三菩提故。是故菩提屬於眾生。若無眾生。一切菩薩。終不能成無上正覺。善男子。汝於此義。應如是解。以於眾生心平等故。則能成就圓滿大悲。以大悲心隨眾生故。則能成就供養如來。菩薩如是隨順眾生。虛空界盡。眾生界盡。眾生業盡。眾生煩惱盡。我此隨順無有窮盡。念念相續。無有間斷。身語意業。無有疲厭。

第九復次恒順眾生。初標名。謂隨順眾生種類根性饒益成就。即利他行。二謂盡法界下。釋相。於中二。一正明。二徵釋。前中亦二。先所順眾生。後如是等類我皆於彼下。正明隨順。二何以故下。徵釋。文分為二。一令佛喜故。二增大悲故。今初。先徵意云。但佛應順。何要順生。釋意云。若順眾生。則為順佛。若不

順生。佛不歡喜。二何以故下。徵。增大悲故。於中二。先徵後釋。徵意云。生佛懸隔。何以順生諸佛歡喜。後釋意云。佛以大悲而為體性。若不順生。不合佛體。文中三。初法說。二喻明。三法合。今初大悲為體者。標示同體大悲故。出現品云。如來成正覺時。普見一切生成正覺。乃至普見一切眾生入涅槃。皆同一性。以了眾生皆無性故。大悲相續救護一切。二譬如曠野下喻明。生死懸絕。迴無所依。名為曠野。不生善法。喻以砂磧。佛菩提法。如大樹王。智慧禪定。猶如枝葉。菩薩依學。況之以華。諸佛證此。自之為果。一切眾生以為其根。以大慈悲而為其水。水滋樹根。華果繁茂。悲含萬類。成佛果因。合文備矣。次生死曠野下。合。於中西。一正合。略不合枝葉。二何以下。重徵釋。三是故下。結成。四善男子汝於下。結示令知。三菩薩如是下。總結無盡。

復次善男子。言普皆回向者。從初禮拜乃至隨順所有功德。皆悉回向盡法界虛空界一切眾生。願令眾生常得安樂。無諸病苦。欲行惡法。皆悉不成。所修善業。皆速成就。關閉一切諸惡趣門。開示人天涅槃正路。若諸眾生。因其積集諸惡業故。所感一切極重苦果。我皆代受。令彼眾生悉得解脫。究竟成就無上菩提。菩薩如是所修回向。虛空界盡。眾生界盡。眾生業盡。眾生煩惱盡。我此回向無有窮盡。念念相續。無有間斷。身語意業。無有疲厭。

第十復次明回向行。初標名。回謂回轉。向謂趣向。回已修善。向於三處。謂實際。菩提。及與眾生。除狹劣障。生廣大善。二從初禮拜下。釋相。於中二。先明所回善根。即前九門。後皆悉下。正明回向。此中正明回向眾生。令成菩提。即向菩提。盡於法界。義同實際。所以要此三者。凡是菩薩。必大悲下化。大智上求。而離眾生及菩提相。又此三者。其必相資。一即具三。方成其一。謂為證實際。須向眾生。以化眾生。成其自利。斷障證真故。亦向菩提。速証菩提。具一切智。斷於二障。方窮實故。餘二准思。更以類取。略有十意。謂依三法故。滅三道故。淨三聚故。顯三佛性。成三寶。會三身。具三德。得三菩提。證三涅槃。安住三種秘密藏故。言三法者。即體相用。亦三般若。謂向實際。依於體法。向菩提者。依於相法。向眾生者。依於用法。餘九三法。次第准知。文中二。先願離苦成善。乃至涅槃。後若諸眾生下。發心代苦。苦由業生。何能代之。略有七意。一起悲意樂。自超凡境。事未必能。二修諸苦行。後能與物為增上緣。即名代苦。三留惑潤生。受有苦身。為物說法。令不造惡。因亡果喪。即名為代。四若見眾生造無間業。當受大苦。無異方便。要須斷命。自墮地獄。命彼脫苦。即名為代。五由初

發心。常處惡趣。乃至飢世身為大魚。即名為代。六大願與苦。皆同真性。今以即真大願。潛至即真之苦。七法界為身。自他無異。眾生受苦。即是菩薩。上七義中。初唯意樂。次二為緣。次二實代。後二理觀。然約有緣方能代耳。三菩薩如是所修下。總結無盡。

善男子。是為菩薩摩訶薩十種大願。具足圓滿。若諸菩薩於此大願隨順趣入。則能成熟一切眾生。則能隨順阿耨多羅三藐三菩提。則能成滿普賢菩薩諸行願海。是故善男子。汝於此義。應如是知。

第四結益令知。

若有善男子。善女人。以滿十方無量無邊不可說不可說佛剎極微塵數一切世界上妙七寶。及諸人天最勝安樂。布施爾所一切世界所有眾生。供養爾所一切世界諸佛菩薩。經爾所佛剎極微塵數劫。相續不斷。所得功德。

大文第二願經勝德分。於中分二。一校量聞德。

若復有人。聞此願王。一經於耳。所有功德。比前功德百分不及一。千分不及一。乃至優波尼沙陀分亦不及一。或復有人。以深信心。於此大願受持讀誦。乃至書寫一四句偈。速能除滅五無間業。所有世間身心等病。種種苦惱。乃至佛剎極微塵數一切惡業。皆得消除。一切魔軍夜叉羅剎。若鳩槃荼。若毗舍闍。若部多等。飲血啖肉諸惡鬼神。皆悉遠離。或時發心親近守護。

二顯餘行德。於中亦二。一總明法行。略說功德。後唯明一行。廣說功德。今初。言法行者。總有十種。一書寫。二供養。三轉施。四聽聞。五披讀。六受持。七開示。八諷誦。九思惟。十修習。今但有四。謂一受持。二讀。三誦。四書寫。兼前聽聞。唯舉五行。乃至二字。義攝所餘。言略說功德者。唯說離惡。亦即現報。

是故若人誦此願者

二偏舉一行。廣顯眾德。舉一例餘。於中分二。先一句舉一行。

行於世間。無有障礙。如空中月。出於雲翳。諸佛菩薩之所稱讚。一切人天皆應禮敬。一切眾生悉應供養。此善男子。善得人身。圓滿普賢所有功德。不久當如普賢菩薩。速得成就微妙色身。具三十二大丈夫相。若生人天。所在之處。常居勝族。悉能破壞一切惡趣。悉能遠離一切惡友。悉能制伏一切外道。悉能解脫一切煩惱。如獅子王摧伏群獸。堪受一切眾生供養。

後辨德。具多勝德。不出五果。文分為三。第二通明五果。第一則明淨土果。第三究竟成佛果。前中分五。一明增上果。有增上用故。二此善男子善得人身下。等流果。亦滿普賢功德行故。三若生人天下。異熟果。乘因感果故。四悉能破壞下。土用果。有菩薩用故。五悉能解脫下。離繫果。八支聖道。滅煩惱故。

又復是人臨命終時。最後剎那。一切諸根。悉皆散壞。一切親屬。悉皆捨離。一切威勢。悉皆退失。輔相大臣。宮城內外。象馬車乘。珍寶伏藏。如是一切無復相隨。唯此願王。不相捨離。於一切時。引導其前。一剎那中。即得往生極樂世界。到已即見阿彌陀佛。文殊師利菩薩。普賢菩薩。觀自在菩薩。彌勒菩薩等。此諸菩薩。色相端嚴。功德具足。所共圍繞。其人自見生蓮花中。蒙佛授記。得授記已。經於無數百千萬億那由他劫。普於十方不可說不可說世界。以智慧力。眾隨生心而為利益。

二別明淨土果。於中二。先顯法功能。後別明勝果。初中謂報盡捨命。一切不隨。唯此願王。引生淨土。同無常經。眷屬皆捨去。財貨任他將。但持自善根。險道充糧食。後到已即見下。別明勝果。於中二。先正化生。亦異熟果。後得授記已下。利生大用。亦土用果。

不久當坐菩提道場。降伏魔軍。成等正覺。轉妙法輪。能令佛剎極微塵數世界眾生。發菩提心。隨其根性。教化成熟。乃至盡於未來劫海。廣能利益一切眾生。

三究竟成佛果。亦離繫果。究竟離故。然前段中。初一現果。今此成佛。即後報果。中間諸果。皆是生報。唯一誦行。五果具足。三報昭彰。終至菩提。於何不習。

善男子。彼諸眾生。若聞若信此大願王。受持讀誦。廣為人說。所有功德。除佛世尊。餘無知者。是故汝等聞此願王。莫生疑念。應當諦受。受已能讀。讀已能誦。誦已能持。乃至書寫。廣為人說。是諸人等。於一念中。所有行願。皆得成就。所獲福聚。無量無邊。能於煩惱大苦海中。拔濟眾生。令其出離。皆得往生阿彌陀佛極樂世界。

大文第三結勸受持分。於中三。初結前勝功德。上猶略嘆。今說無盡。次是故汝等下。正明勸持。通十法行。後是諸人等下。重舉勝德。殷勤顯德。意在勸持。然此一卷。文少義豐。是修行之玄樞。乃華嚴之幽鍵。功高德遠。何不修持。西天道流。未有不習也。

爾時普賢菩薩摩訶薩欲重宣此義。普觀十方而說偈言。

第二偈頌。總有六十二偈。亦分三段。第一五十二偈。頌前正示普因。第二七偈。頌顯經勝德。第三三偈。頌結勸受持。初中有二。先別頌十門。後一偈。總頌無盡。前中文有八。後三合故。

**所有十方世界中。三世一切人師子。
我以清淨身語意。一切遍禮盡無餘。
普賢行願威神力。普現一切如來前。
一身復現刹塵身。一一遍禮刹塵佛。**

初有二偈。頌禮敬諸佛。於中初二句頌所禮。次一句能禮。次句明周遍。次句辨遍因。後三句別顯禮相。謂一一佛所。各有多身。一一己身。能起多禮。故晉經云。一一一切來所。一切刹塵禮。

**於一塵中塵數佛。各處菩薩眾會中。
無盡法界塵亦然。深信諸佛皆充滿。
各以一切音聲海。普出無盡妙言辭。
盡於未來一切劫。讚佛甚深功德海。**

二有二偈。頌稱讚諸佛。

**以諸最勝妙華鬘。伎樂塗香及傘蓋。
如是最勝莊嚴具。我以供養諸如來。
最勝衣服最勝香。末香燒香與燈燭。
一一皆如妙高聚。我悉供養諸如來。
我以廣大勝解心。深信一切三世佛。
悉以普賢行願力。普遍供養諸如來。**

三有三偈。頌供養如來。此中唯說本行供養。不頌校量法供養勝。明知長行校量本行。

**我昔所造諸惡業。皆由無始貪瞋癡。
從身語意之所生。一切我今皆懺悔。**

四有一偈。頌懺悔惡業。

**十方一切諸眾生。二乘有學及無學。
一切如來與菩薩。所有功德皆隨喜。**

五有一偈。頌隨喜功德。

**十方所有世間燈。最初成就菩提者。
我今一切皆勸請。轉於無上妙法輪。**

六有一偈。頌請轉法輪。

**諸佛若欲示涅槃。我悉至誠而勸請。
唯願久住刹塵劫。利樂一切諸眾生。**

七有一偈。頌請佛住世。

**所有禮讚供養福。請佛住世轉法輪。
隨喜懺悔諸善根。回向眾生及佛道。**

八四十偈。合頌後三。以後三行皆回向故。八九但是回向別義。八隨佛學。是向菩提。通於二利。九順眾生。是向眾生。一向利他。故此三門不相捨離。文中二。先三十六偈。合頌三門。後四偈。願生淨土。前中三。初一偈總標回向。二三四偈。別頌三門。三有一偈。結歸回向。彌顯三門皆回向也。今初。以該八九。故不依前次。三句牒前所回善根。八九二門屬回向故。但牒前七。第四一句。正明回向。略舉二處。實際離相。遍該於二。在無盡中。

**我隨一切如來學。修習普賢圓滿行。
供養過去諸如來。及與現在十方佛。
未來一切天人師。一切意樂皆圓滿。
我願普隨三世學。速得成就大菩提。**

二三四偈。別頌三門。即分為三。雖同回向。長行既開。故略標別義。初二偈。頌隨如來學。

**所有十方一切刹。廣大清淨妙莊嚴。
眾會圍繞諸如來。悉在菩提樹王下。
十方所有諸眾生。願離憂患常安樂。
獲得甚深正法利。滅除煩惱盡無餘。**

二有二偈。頌恒順眾生。以順眾生即順諸佛。故先舉諸佛。又佛坐樹下。為化生故。故晉譯云。如來坐道場。菩薩眾充滿。令十方眾生。除滅諸煩惱。明知相連。

**我為菩提修行時。一切趣中成宿命。
常得出家修淨戒。無垢無破無穿漏。
天龍夜叉鳩槃荼。乃至人與非人等。
所有一切眾生語。悉以諸音而說法。**

三三十偈。頌前回向。前略今廣。此下大願。亦是伽陀。然回向與願。大同小異。異謂回向要有所回。發願無善亦可要誓。言大同者。十回向位。大願為體。總願別願。皆回向故。今此即是回向大願。文有十願。全同初地。但次不同。文分為二。初二十二偈。別發大願。後有八偈。總結大願。前中十願。即為十別。第一二偈。明受持願。亦名獲法願。故十地經云。願受一切佛法輪。願攝一切佛菩提。願護一切諸佛教。願持一切諸佛法。今文初句攝菩提。次句攝佛法。二句護佛教。修行戒行。為護行故。後偈願受一切佛法輪。即是如來以一切音而說諸法。今能遍

受。故上經云。能令三界所有聲聞。聞者皆是如來音。

**勤修清淨波羅蜜。恒不忘失菩提心。
滅除障垢無有餘。一切妙行皆成就。
於諸惑業及魔境。世間道中得解脫。
猶如蓮花不著水。亦如日月不住空。**

二有二偈。修行二利願。於中一切妙行皆成就者。此是總句。謂廣無量世間種種行故。亦行方便。餘句為別。初句行體。即十波羅蜜。除蔽清淨。第三句是行業。以十度行。淨十種蔽。助真如觀。淨十障故。後偈行相。於諸惑業得解脫者。即出世間行。及魔境界世間道中得解脫者。即世間行。猶如蓮花及日月喻。雙喻冥行。處於世界。猶如虛空。亦如蓮華不著水故。身心清淨。超彼岸故。上之七句。皆是能增長行。第二句是所增長心。由依此義。此行亦名心增長行。故十地云。令其受行。心得增長。

**悉除一切惡道苦。等與一切群生樂。
如是經於剎塵劫。十方利益恒無盡。
我常隨順諸眾生。盡於未來一切劫。
恒修普賢廣大行。圓滿無上大菩提。**

三有二偈。成熟眾生行願。第五句總。餘句為別。初句離苦。因果皆離。次句得樂。乃至涅槃。第三豎長。第四橫遍。後三句總結長時所成因果。即十地經令安住一切智道。

**所有與我同行者。於一切處同集會。
身口意業皆同等。一切行願同修學。
所有益我善知識。為我顯示普賢行。
常願與我同集會。於我常生歡喜心。**

四有二偈。明不離願。謂願於一切生處。恒不離佛及諸菩薩。得同意行故。亦名心行願。願不離一乘故。初句為總。同志一乘故。餘句為別。於中先三句自分行同。意業同者。平等一緣故。身業同者。同得如意神通故。語業同者。同說一味法故。上即三輪同。一切行願同者。若福若智。萬行皆同。後一偈勝進同。以更成益。復顯示故。

**願常面見諸如來。及諸佛子眾圍繞。
於彼皆興廣大供。盡未來劫無疲厭。
願持諸佛微妙法。光顯一切菩提行。
究竟清淨普賢道。盡未來劫常修習。**

五二偈。供養願。願供勝田故。第三句為總。興廣大供故。大有六種。一心

大。無疲厭故。二供具大。財法正行。皆具足故。財供攝在總句。正行。即第五六句。三福田大。即初二句。四攝功德大。即第七句中清淨二字。如空清淨。為無常愛果。及常果之因故。六時大。即第八句。

**我於一切諸有中。所修福智恒無盡。
定慧方便及解脫。獲諸無盡功德藏。
一塵中有塵數刹。一一刹有難思佛。
一一佛處眾會中。我見恒演菩提行。**

六有二偈。明利益願。願於一切時。恒作利益眾生事業。無空過故。亦名三業不空願。前偈修福智等為不空因。獲無盡藏是不空果。謂暫見身則必定佛法。暫聞音聲。則得實智慧。才生淨信。則永斷煩惱。得如大藥王樹身。得如如意寶身。名功德藏。後偈利益時處。謂遍於時處。求能益法。利眾生故。十地經云。乘不退輪。修菩提行。今見諸佛演菩提行。即乘教輪修菩薩行。

**普盡十方諸刹海。一一毛端三世海。
佛海及與國土海。我遍修行經劫海。
一切如來語清淨。一言具眾音聲海。
隨諸眾生意樂音。一流佛辨才海。
三世一切諸如來。於彼無盡語言海。
恒轉理趣妙法輪。我深智力普能入。**

七有二偈。明轉法輪願。亦名攝法上首願。謂佛轉法輪。願皆攝取而轉授故。文中初偈轉法輪處。次一偈能轉圓音。次二句轉法輪時。第十一句所轉法輪。末後一句。即能攝方便。

**我能深入於未來。盡一切劫為一念。
三世所有一切劫。為一念際我皆入。
我於一念見三世。所有一切人師子。
亦常入佛境界中。如幻解脫及威力。**

八有二偈。明淨土願。願清淨自土。安立正法及能修行諸眾生故。略無淨土之言。以影在後段故。而具淨土七種淨義。初偈即同體淨。以同法性故。令一多互相即入。今文雖辨念劫圓融。意取時中圓融之刹。二有半偈。明自在淨。如摩尼珠。美惡斯現。自在圓通。是故文云於一念見。舉其佛者。顯是佛土。在亦常入佛境界中者。即是因淨。因有二種。一者生因。謂六度等。如淨名說。二者依因。此復有二。一鏡智淨識。為土所依。二後智通慧。為土所依。此二皆是諸佛境界。又境界者。即是相淨。謂七珍等。第八一句。攝於三淨。謂四以如幻二字。即是果淨。果亦有二。一所生果。即是相淨。略在境界。廣則影在後承事中。二示現果。臨機示

現。故云如幻。五解脫威力。即受用淨。謂受用淨土。離過成德。如用香飯得三昧等。今解脫煩惱。即是離過。道力之能。即是成德。故地經云。成就清淨道。六梵本此句無及威力。有眷屬字。即是住處眾生淨。人寶為嚴故。七者相淨。已如前說。

**於一毛端極微中。出現三世莊嚴刹。
十方塵刹諸毛端。我皆深入而嚴淨。
所有未來照世燈。成道轉法悟群有。
究竟佛事示涅槃。我皆往詣而親近。**

九有二偈。明承事願。願往諸佛土常見諸佛。恒時敬事。聽受法故。第八句為總。餘皆是別。初之一偈。即承事處。初二句通是真實義相。互相涉入。如帝网故。就中三世莊嚴刹。即一切相。淨土體相有差別故。第三句即無量相。謂前二相遍十方故。其第四句。辨能知見。故地經云。智皆明了現前知見。明唯智知。非識境故。故梵本云。我甚深入莊嚴刹。深入有二。一智深入。二身深入。入彼莊嚴刹中。承事如來。非嚴淨彼。若去而字下加刹字。理應無違矣。第五一句。所承事佛。所有佛故。六七二句。即承事時八相時故。

**速疾周遍神通力。普門遍入大乘力。
智行普修功德力。威神普覆大慈力。
遍淨莊嚴勝福力。無著無依智慧力。
定慧方便威神力。普能積集菩提力。
清淨一切善業力。摧滅一切煩惱力。
降伏一切諸魔力。圓滿普賢諸行力。**

十有三偈。成正覺願。願與一切眾生。同時皆得無上菩提。恒作佛事故。文有十二力。前九明業用。後三結因成果。前中九句。有其七業。一初句即自在業。以神通力普周遍故。二一句示正覺業。不離一毛端處。而於一切處八相成道。故名普門。合云以大乘力遍普門。謂大乘稱理。互相即入而普遍故。三次三句即說實諦業。謂說實諦。令物悟故。文中通舉說德及益。謂一以智行力內滿功德。二以大慈力普覆而說。故梵本云。以智行力功德滿。以大慈力覆一切。後句以福德力遍清淨。即是自他離障。亦說之益。四次第六句。即證教業。說自所證以化物故。謂以菩提智。契涅槃理。故無所依。梵本云。以智慧力無所依。五一句。種種說法業。具足定慧方便等故。六一句。不斷佛種業。積集菩提。佛種豈斷。七一句。法輪復住業。依大智慧。能淨一切諸善根故。後三句。結因成果。由內伏煩惱。外降諸魔。普賢行圓。故成菩提。亦可後三復為三業。以成圓十。八摧滅煩惱業。九降伏

魔怨業。十普圓勝因業。上已別說十願竟。

普能嚴淨諸刹海。解脫一切眾生海。
善能分別諸法海。能甚深入智慧海。
普能清淨諸刹海。圓滿一切諸願海。
親近供養諸佛海。修行無倦經劫海。
三世一切諸如來。最勝菩提諸行願。
我皆供養圓滿修。以普賢行悟菩提。

第二有八偈。總結大願。於中二。先有三偈。總結十願。後有五偈。結歸二聖。今初。前之八海。結前九願。後之一偈。結正覺願。前中謂一淨土願。二成熟眾生願。三轉法輪願。四受持願。五修行二利願。六利益願。由願圓故。七有二願。親近二字。即承事願。供養二字。即供養願。諸佛海言。通上二願。八即不離願。不離同志。故長時無倦。後偈結正覺者。以三世因圓。正覺果滿故。

一切如來有長子。彼名號曰普賢尊。
我今回向諸善根。願諸智行悉同彼。
願身口意恒清淨。諸行刹土亦復然。
如是智慧號普賢。願我與彼皆同等。

二五偈。結歸二聖。及攝所餘。歸二聖者。謂普賢文殊彰行所屬。亦即釋成普賢行願名。法門主故。言攝所餘者。謂餘不說一切大願。是故文云一切願海。即同地經如是無量百千萬億阿僧祇大願。文中二。初二偈偏同普賢。後三偈雙齊二聖。今初。所以同者。普賢行故。稱法界故。言長子者。最尊勝故。出現品亦云誰是如來法長子故。若表法者。即表法界。先萬物生。無過此故。如有偈云。普賢真身遍法界。能為世間自在主。無始無終無生滅。性相常住等虛空。既無有始。即是長義。不捨因行。故為佛子。但云同等。非但無量阿僧祇願。如法界量無盡願行。皆悉願同。

我為遍淨普賢行。文殊師利諸大願。
滿彼事業盡無餘。未來際劫恒無倦。
我所修行無有量。獲得無量諸功德。
安住無量諸行中。了達一切神通力。
文殊師利勇猛智。普賢慧行亦復然。
我今回向諸善根。隨彼一切常修學。

後三偈雙同二聖者。文殊表解。解發願故。普賢表行。依解起行故。故願與行。分屬二聖。理實皆通。又表理智一相契合。行願相扶。所以雙同。

三世諸佛所稱嘆。如是最勝諸大願。

我今回向諸善根。為得普賢殊勝行。

第三一偈結歸回向者。上來諸願。皆屬回向。彌顯三段皆屬回向。

**願我臨欲命終時。盡除一切諸障礙。
面見彼佛阿彌陀。即得往生安樂剎。
我既往生彼國已。現前成就此大願。
一切圓滿盡無餘。利樂一切眾生界。
彼佛眾會咸清淨。我時於勝蓮花生。
親睹如來無量光。現前授我菩提記。
蒙彼如來授記已。化身無數百俱胝。
智力廣大遍十方。普利一切眾生界。**

第二四偈。願生淨土。全同長行。顯經勝德轉生之益。此令起願。彼約說益。為意不同。不生華藏而生極樂。略有四意。一有緣故。二欲使眾生歸憑情一故。三不離華藏故。四即本師故。

**乃至虛空世界盡。眾生及業煩惱盡。
如是一切無盡時。我願究竟恒無盡。**

第二一偈。總頌十門。總結無盡。亦別屬十願十無盡句。

**十方所有無邊剎。莊嚴眾寶供如來。
最勝安樂施天人。經一切剎微塵劫。
若人於此勝願王。一經於耳能生信。
求勝菩提心渴仰。獲勝功德過於彼。**

第二七偈。頌顯經勝德。文亦分二。先有二偈。頌前校量聞益。

**即常遠離惡知識。永離一切諸惡道。
速見如來無量光。具此普賢最勝願。
此人善得勝壽命。此人善來人中生。
此人不久當成就。如彼普賢菩薩行。
往昔由無智慧力。所造極惡五無間。
誦此普賢大願王。一念速疾皆消滅。
族姓種類及容色。相好智慧咸圓滿。
諸魔外道不能摧。堪為三界所應供。**

後五偈。頌通顯諸行益。長行有三。一通明五果。二別明淨土果。三究竟菩提果。其生淨土。在前願中。但頌初後。即分為二。前四偈。頌通顯五果。後一偈。頌究竟果。今初。文具五果。初偈增上果。次偈等流果。次偈離繫果。次半偈異熟果。次半偈土用果。

速詣菩提大樹王。坐已降伏諸魔眾。

成等正覺轉法輪。普利一切諸含識。

後一偈。頌究竟果可知。

**若人於此普賢願。讀誦受持及演說。
果報唯佛能證知。決定獲勝菩提道。
若人誦此普賢願。我說少分之善根。
一念一切悉皆圓。成就眾生清淨願。
我此普賢殊勝行。無邊勝福皆回向。
普願沉溺諸眾生。速往無量光佛刹。**

第三三偈。結勸受持。初半偈結前諸行。次一偈半。重顯勝益。後一偈。結成回向。普及眾生。

爾時普賢菩薩摩訶薩。於如來前。說此普賢廣大願王清淨偈已。善財童子。踊躍無量。一切菩薩。皆大歡喜。如來讚言。善哉善哉。

第三結說讚善。

爾時世尊與諸聖者菩薩摩訶薩。演說如是不可思議解脫境界勝法門時。

大文第三流通分。於中二。先指所說法。後時眾受持。今初。向普賢說。已是義結。今云佛說。亦是義生。意欲總該。亦有二意。一此之一會。佛為會主。雖諸善友。以總該別。亦屬佛說。二遍該九會。以皆不起菩提樹王。遍一切處。一時頓說。向見普賢在菩提場。攝末歸本。以本該末。並為佛說。

文殊師利菩薩而為上首。諸大菩薩及所成熟六千比丘。彌勒菩薩而為上首。賢劫一切諸大菩薩。無垢普賢菩薩而為上首。一生補處住灌頂位諸大菩薩。及餘十方種種世界普來集會一切剎海極微塵數諸菩薩摩訶薩眾。

二時眾受持。於中亦二。先列能持眾。後總顯受持。前中三。一列菩薩。次列聲聞。後別雜類。今初。文有四類。前之二類。多在此會。第三普賢。義通常隨。則遍該九會。第四種種世界普集會。跡通二義。一是前來遠集新眾。二通九會。集有遠近。

大智舍利弗。摩訶目犍連等。而為上首。諸大聲聞。

二列聲聞眾。唯局此會。

並諸人天一切世主。天龍。夜叉。乾闥婆。阿修羅。迦樓羅。緊那羅。摩睺羅伽。人非人等。一切大眾。

三列雜類眾。

聞佛所說。皆大歡喜。信受奉行。

二彰其信受。通前諸眾。

普賢行願品疏節錄

謹案明憨山大師提挈清涼國師華嚴疏文為華嚴綱要八十卷。中土久佚。今得自日本續藏刻行於世。尉竊惟華嚴十萬偈。晉譯三萬六千偈都六十卷。唐譯四萬五千偈都八十卷。其入法界一品。晉十六卷。唐二十一卷。經來未盡也。唐德宗貞元間。此品全本梵文至。譯為四十卷。具曰：入不思議解脫境界普賢行願品。簡曰入法界品。亦曰普賢行願品。清涼國師先已撰華嚴疏鈔。此品全文譯成。復疏十卷釋之。又以此最後一卷實為華嚴關鍵、修行樞機。更為別行疏。圭峰為之鈔。亦既盛行於世。今因校該華嚴綱要成。謹以此一卷經附後。用便誦持。依憨山例附入疏文。未敢語於提挈。故稱節錄云。浙西徐文尉識。

計刻此卷連圈計字一萬六千九百十五個付刻資五十九元正

民國十年四月北京刻經處識

文殊師利發願經

東晉天竺三藏佛陀跋陀羅譯

身口意清淨。除滅諸垢穢。一心恭敬禮。十方三世佛。
普賢願力故。悉睹見諸佛。一一如來所。一切剎塵禮。
於一微塵中。見一切諸佛。菩薩眾圍繞。法界塵亦然。
以眾妙音聲。宣揚諸最勝。無是功德海。不可得窮盡。
以普賢行力。無上眾供具。供養於十方。三世一切佛。
以妙香華鬘。種種諸伎樂。一切妙莊嚴。普供養諸佛。
我以貪恚癡。造一切惡行。身口意不善。悔過悉除滅。
一切眾生福。諸聲聞緣覺。菩薩及諸佛。功德悉隨喜。
十方一切佛。初成等正覺。我今悉勸請。轉無上法輪。
示現涅槃者。合掌恭勸請。住一切塵劫。安樂諸群生。
我所集功德。回向施眾生。究竟菩薩行。逮無上菩提。
悉供養過去。現在十方佛。願未來世尊。速成菩提道。
普莊嚴十方。一切諸佛剎。如來坐道場。菩薩眾充滿。
令十方眾生。除滅諸煩惱。深解真實義。常得安樂住。
我修菩薩行。成就宿命智。除滅一切障。永盡無有餘。
悉遠離生死。諸魔煩惱業。猶日處虛空。蓮花不著水。
遍行游十方。教化諸群生。除滅惡道苦。具足菩薩行。
雖隨順世間。不捨菩薩道。盡未來際劫。具修普賢行。
若有同行者。願常集一處。身口意善業。皆悉令同等。
若遇善知識。開示普賢行。於此菩薩所。親近常不離。
常見一切佛。菩薩眾圍繞。盡未來際劫。悉恭敬供養。
守護諸佛法。讚嘆菩薩行。盡未來劫修。究竟普賢道。
雖在生死中。具無盡功德。智慧巧方便。諸三昧解脫。
一一微塵中。見不思議剎。於一一剎中。見不思議佛。
見如是十方。一切世界海。一一世界海。悉見諸佛海。
於一言音中。具一切妙音。一一妙音中。具足最勝音。
甚深智慧力。入無盡妙音。轉三世諸佛。清淨正法輪。
一切未來劫。悉能作一念。三世一切劫。悉為一念際。
一念中悉見。三世諸如來。亦普分別知。解脫及境界。
於一微塵中。出三世淨剎。一切十方塵。莊嚴剎亦然。
悉見未來佛。成道轉法輪。究竟佛事已。示現入涅槃。
神力遍游行。大乘力普門。慈力覆一切。行力功德滿。
功德力清淨。智慧力無礙。三昧方便力。逮得菩提力。

清淨善業力。除滅煩惱力。壞散諸魔力。具普賢行力。
嚴淨佛剎海。度脫眾生海。分別諸業海。窮盡智慧海。
清淨諸行海。滿足諸願海。悉見諸佛海。我於劫海行。
三世諸佛行。及無量大願。我皆悉具足。普賢行成佛。
普賢菩薩名。諸佛第一子。我善根回向。願悉與彼同。
身口意清淨。自在莊嚴剎。逮成等正覺。皆悉同普賢。
如文殊師利。普賢菩薩行。我所有善根。回向亦如是。
三世諸如來。所嘆回向道。我回向善根。成滿普賢行。
願我命終時。除滅諸障礙。面見阿彌陀。往生安樂國。
生彼佛國已。成滿諸大願。阿彌陀如來。現前授我記。
嚴淨普賢願。滿足文殊願。盡未來際劫。究竟菩薩行。

文殊師利發願經

謹案此與唐貞元譯大方廣佛華嚴經入不思議解脫境界普賢行願品四十卷之末卷偈同本異譯。偈文總有三譯。此其第一譯也。北京刻經處識

校此刻經。共字一千零零三個。付刻資三元五角民國十一年一月北京刻經處又識

普賢菩薩行願讚

唐大興善寺三藏沙門不空奉詔譯

所有十方世界中。一切三世人師子。
我今禮彼盡無餘。皆以清淨身口意。
身如剎土微塵數。一切如來我悉禮。
皆以心意對諸佛。以此普賢行願力。
於一塵端如塵佛。諸佛佛子坐其中。
如是法界盡無餘。我信諸佛悉充滿。
於彼無盡功德海。以諸音聲功德海。
闡揚如來功德時。我常讚嘆諸善逝。
以勝華鬘及塗香。及以伎樂勝傘蓋。
一切嚴具皆殊勝。我悉供養諸如來。
以勝衣服及諸香。末香積聚如須彌。
殊勝燈明及燒香。我悉供養諸如來。
所有無上廣大供。我悉勝解諸如來。
以普賢行勝解力。我禮供養諸如來。
我曾所作眾罪業。皆由貪欲瞋恚癡。
由身口意亦如是。我皆陳說於一切。
所有十方群生福。有學無學辟支佛。
及諸佛子諸如來。我皆隨喜咸一切。
所有十方世間燈。以證菩提得無染。
我今勸請諸世尊。轉於無上妙法輪。
所有欲現涅槃者。我皆於彼合掌請。
惟願久住剎塵劫。為諸群生利安樂。
禮拜供養及陳罪。隨喜功德及勸請。
我所積集諸功德。悉皆回向於菩提。
於諸如來我修學。圓滿普賢行願時。
願我供養過去佛。所有現在十方世。
所有未來速願成。意願圓滿證菩提。
所有十方諸剎土。願皆廣大咸清淨。
諸佛咸詣覺樹王。諸佛子等皆充滿。
所有十方諸眾生。願皆安樂無眾患。
一切群生獲法利。願得隨願如意心。
我當菩提修行時。於諸趣中憶宿命。
若諸生中為生滅。我皆常當為出家。

戒行無垢恒清淨。常行無缺無孔隙。
天語龍語夜叉語。鳩槃荼語及人語。
所有一切群生語。皆以諸音而說法。
妙波羅蜜常加行。不於菩提心生迷。
所有眾罪及障礙。悉皆滅盡無有餘。
於業煩惱及魔境。世間道中得解脫。
猶如蓮花不著水。亦如日月不著空。
諸惡趣苦願寂靜。一切群生令安樂。
於諸群生行利益。乃至十方諸剎土。
常行隨順諸眾生。菩提妙行令圓滿。
普賢行願我修習。我於末劫修行時。
所有共我同行者。共彼常得咸聚會。
於身口業及意業。同一行願而修習。
所有善友益我者。為我示現普賢行。
共彼常得而聚會。於彼皆得無厭心。
常得面見諸如來。與諸佛子共圍繞。
於彼皆興廣供養。皆於未來劫無倦。
常持諸佛微妙法。皆令光顯菩提行。
咸皆清淨普賢行。皆於未來劫修行。
於諸有中流轉時。福德智慧得無盡。
般若方便定解脫。獲得無盡功德藏。
如一塵端如塵剎。彼中佛剎不思議。
佛及佛子坐其中。常見菩提勝妙行。
如是無量一切方。於一毛端三世量。
佛海及與剎土海。我入修行諸劫海。
於一音聲功德海。一切如來清淨聲。
一切群生意樂音。常皆得入佛辯才。
於彼無盡聲音中。一切三世諸如來。
當轉理趣妙輪時。以我慧力普能入。
以一剎那諸未來。我入未來一切劫。
三世所有無量劫。剎那能入俱胝劫。
所有三世人師子。以一剎那我咸見。
於彼境界常得入。如幻解脫行威力。
所有三世妙嚴剎。能現出生一塵端。
如是無盡諸方所。能入諸佛嚴剎土。
所有未來世間燈。彼皆覺悟轉法輪。

示現涅槃究竟寂。我皆往詣於世尊。
以神足力普迅疾。以乘威力普遍門。
以行威力等功德。以慈威力普遍行。
以福威力普端嚴。以智威力無著行。
般若方便等持力。菩提威力皆積集。
皆於業力而清淨。我今摧滅煩惱力。
悉能降伏魔羅力。圓滿普賢一切力。
普令清淨剎土海。普能解脫眾生海。
悉能觀察諸法海。及以得源於智海。
普令行海咸清淨。又令願海咸圓滿。
諸佛海會咸供養。普賢行劫無疲倦。
所有三世諸如來。菩提行願眾差別。
願我圓滿悉無餘。以普賢行悟菩提。
諸佛如來有長子。彼名號曰普賢尊。
皆以彼慧同妙行。回向一切諸善根。
身口意業願清淨。諸行清淨剎土海。
如彼智慧普賢名。願我於今盡同彼。
普賢行願普端嚴。我行曼殊室利行。
於諸未來劫無倦。一切圓滿作無餘。
所須勝行無能量。所有功德不可量。
無量修行而住已。盡知一切彼神通。
及至虛空得究竟。眾生無餘究竟然。
及業煩惱乃至盡。乃至我願亦皆盡。
若有十方無邊剎。以寶莊嚴施諸佛。
天妙人民勝安樂。如剎微塵劫捨施。
若人於此勝願王。一聞能生勝解心。
於勝菩提求渴仰。獲得殊勝前福聚。
彼得遠離諸惡趣。彼皆遠離諸惡友。
速疾得見無量壽。唯憶普賢勝行願。
得大利益勝壽命。善來為此人生命。
如彼普賢大菩薩。彼人不久當獲得。
所作罪業五無間。由無智慧而所作。
彼誦普賢行願時。速疾銷滅得無餘。
智慧容色及相好。族姓品類得成就。
於魔外道得難摧。常於三界得供養。
速疾往詣菩提樹。到彼坐已利有情。

覺悟菩提轉法輪。摧伏魔羅並營從。
 若有持此普賢願。讀誦受持及演說。
 如來具知得果報。得勝菩提勿生疑。
 如妙吉祥勇猛智。亦如普賢如是智。
 我當習學於彼時。一切善根悉回向。
 一切三世諸如來。以此回向殊勝願。
 我皆一切渚善根。悉以迴向普賢行。
 當於臨終捨壽時。一切業障皆得轉。
 親睹得見無量光。速往彼刹極樂界。
 得到於彼此勝願。悉皆現前得具足。
 我當圓滿皆無餘。眾生得益於世間。
 於彼佛會甚端嚴。生於殊勝蓮花中。
 於彼獲得受記別。親對無量光如來。
 於彼獲得受記已。變化俱胝無量種。
 廣作有情諸利樂。十方世界以慧力。
 若人誦持普賢願。所有善根而積集。
 以一剎那得如願。以此群生獲勝願。
 我獲得此普賢行。殊勝無量福德聚。
 所有群生溺惡習。皆往無量光佛宮。

普賢菩薩行願品讚

速疾滿普賢行願陀羅尼曰：

曩麼悉底哩也^{四合}地尾^{二合}迦^引南^一但他^引孽多南^二唵^{引三}阿^引戍縛囉尾擬你娑縛^{二引}
 訶^{引四}

每日誦普賢菩薩行願讚後。即誦此真言。才誦一遍。普賢行願悉皆圓滿。三摩地人。速得三昧現前。福德智慧二種莊嚴。獲堅固法。速疾成就。

謹案此篇亦與普賢行願品末卷偈文同本異譯。是為第二譯。北京刻經處識。

校刻此經共字二千零二十一個付刻資七元
 民國十一年。一月北京刻經處又識。